

I fröie mi, nachstehend äs paar Momänte vomene usgefüllte Jahr lah ufzläbe.

Gmeinsam wei mir Spure lege, Spure foug, Spure entdecke i dr Natur, i däm, was i üsem eigete Innere läbt u i dr Begänig mit angere Mönsche. Die Gedanke sie drhinger gstande, wo mir im Rat, afang Jahr ds Motto „Spure“ i üses Chiucheläbe ufgno hei. Ir Zytig *reformiert*. heit dir sicher uf üser Syte, ds Krüzworträtsu gseh u vilich o mitgrätslet. *Neues, Spass, Mut, Vertrauen, überwinden* u *gemeinsam* si die gsuechte Wörter gsi u mitts, sänkrächt abe gläse, hets de ds Lösigswort „Spuren“ gä.

Allgemeins

Unger dr Leitig vom nöie Co-Präsidium René Lehmann u Trix Brunner si mir mit Muet u Vertroue gmeinsam i ds nöie Chiuchejahr gstartet. Üsi Agstellte, die zahlriiche Freiwillige u o dr Chirchgmeindrat hei im vergangene Jahr gueti Arbeit gleischtet. Dr Rat het sech a 12 Sitzige troffe, im chlinere Rahme si no Sitzige nötig worde, wes um d'Pfrundlieschaft, um Personells oder d Jugendarbeit gange isch.

Aktivitäté usem Chiucheläbe

Agfange hei mir üses Chiuchejahr mit em traditionelle Spaghettiasse u em Wäg zur Chrippe. Im Rahme vor Erwachsenebildig hei sech im Januar a 3 Abe Interessierti, unger dr Leitig vor Veronique Ott, mit dr Schöpfig, dr Evolution u em Kreationismus usenang gsetzt. Am Riistag isch wiederum e beachtleche Betrag vo Fr..... zämecho, wo mir ane Institution in Indie hei dörfe überwiise. Mit aune Sinne hei mer am 1. Februar dr Chiuchesunntig gfiiret. Am Ehekurs, unger em Patronat vor Chiuche, hei a 7 Kursabe 9 Paar teilgno. Immer guet bsuecht si d'Seniorenamtage, mit em vieufäutig zämegesteute Programm vom Susi Weber u ihrem Team gsi. D Susi het i Zämearbeit mit em Froueverein Kirchdorf no ä Männerkochkurs 55+ organisiert. Es hei sech 12 Manne a 5 Abe ire Gmeinschaft troffe, zum choche, schlemme, Rezäpt ustusche u sogar gsunge isch no worde. Ja, da si Spure usetreit worde, mängi Ehefrou het sech vo ihrem Ma u sine nöierworbene Chochkünscht dörfe la verwöhne. Spure si o ir Reiraite vom Rat in Flühli ds Thema gsi. Dr Referänt Ruedi Heinzer het üs über d Bedütig vo üsne Spure, wo mir zieh oder nachegö vieu Interessants chönne verzeue. Näbscht em intensive Ustusch hei mir o di wohlthuende Momänte bim kneippe, lache u singe gnosse. Mitte Juni isch e Gruppe mit em Samuel Glauser, im Rahme vome Gmeindwuchenänd, i ds Elsass greiset u het sech uf d'Spure vom Albert Schweizer gmacht. Höhepunkte für üsi Jugend, si die verschiedene Lager gsi. Mit vieu Engagement u Spass si Teilnähmer, Leiter u freiwilligi Teamler jewils drby. Grad us dene Lager, unger dr Leitig vom Samuel Glauser blibe bi aune Teilnehmende vieu Spure hafte, wo sie sech de später im Läbe, öb im Bruef oder privat gärn dra zrüg gsinne u i mänger Situation chöi hiufrich si. Im Ouguscht si 23 Seniore mit Team i d Feriewuche nach Appenzell greiset u hei ire fröhliche Gmeinschaft unvergässlechi 5 Tag verbracht. Dr diesjährig Rats-u Personalusflug het üs i ds Illusorialand (Museum für opteschi Tüschige u Holographie) nach Ittigen gfuehrt. Regelmässig traffe sech Glichgsinnti zum Ustusch im offene Gsprächskreis, im Senioreträffe u im Missionslimerchränzli, d Jugend trifft sech ir Krabbelgruppe, WächtigsSunntigschuel, Arche, Jungschi u Oase. Dr Vorstand vo de Abekonzärt het o das Jahr drü guet bsuechti Konzärt organisiert. Es louft vieu i üser Chirchgmeind! Paralell zu au dene Aktivitäté het dr Rat dr Chouf vor Pfrundlieschaft u ds Jugendarbeitskonzept usgearbeitet, so dass beides dr Kirchgmeindsversammlig cha vorgleit u drüber cha abgstimmt wärde. Es eher schwierigs Thema si das Jahr d Sachbeschädigunge in Uttige um ds KGH gsi, wo immer wieder i Zämehang mit dr OASE bracht si worde. D OASE louft wieder unger dr Obhuet vor Chiuche, mir hoffe, dass mir das Problem i Griff überchöme. Vorbereitige si am loufe.

Personells

Mit grosssem Bedure hei mir d Kündigung vo üsem Organist Pip uf ändi Juni müesse entgäge nä. Über 20 Jahr isch är mit Härz derbi gsi u het vieu gmacht fürs Gottesdienschtfiire u d Musik i üser Chirchgmeind. Danke Pip, für au die schöne, unvergässleche Spure, wo du i üser Chirchgmeind u i üsne Härz hesch hingerlah. Nach längerer Suechi hei mir d Annarös Hulliger u Mischa Matter chönne asteue. Üses Organisteteam um e Beat Ast u dr Lee Stalder, ä taläntierte junge Maa, wo scho sit afang Jahr bi üs Orgele spiu wird ab 1.1.2010 mit dene beide Froue verstärkt. Mir heisse Frou Hulliger u Frou Matter härzlech wiukomme u fröie üs uf ihri Musik. Sit em Oktober macht dr Balthasar Beachtold im Rahme vom Theol. Studium, es 3-monatigs Praktikum i üser Chirchgmeind.

Zuekünftigs

A sire nächschte Sitzig wird dr Chirchgmeindrat d Ressort nöi verteile. Je nach Abstimmigsergäbnis wird dr Chouf vor Pfrundlieschaft abgchlosse u ds nöie Jugendarbeitskonzept zur Umsetzig cho. Wie obe scho erwähnt, wärde mir üs zäme mit dr Gmeind Uttige, für ne gueti Lösig gäge Vandalismus rund um d OASE, isetze. Mir danke aune härzlech, wo i irgend ere Art u Wys vor oder hinger de Kulisse zum Wohl vo üsere Chiuche mithäufe u mitdänke. Mir fröie üs, o im 2010 mit öich unterwägs dörfe z sy – u gö mer d Useforderige, wo wärde cho, gmeinsam a.